

國朝詩人徵略二編

國朝詩人徵略二編卷五十四

番禺張維屏子樹輯

林伯桐

字桐君號月亭廣東番禺人嘉慶六年舉人官德慶州學正有脩本堂集

君辛酉舉於鄉道光甲辰選授德慶州學正卒于官年七十君事親孝父歿不復上公車與兩弟友愛待人無論尊卑貴賤皆敬且和生平於學無所不窺尤篤志經學研經宗漢儒而踐履則服膺朱子十三經注疏皆手自丹鉛廿四史及諸子諸集

凡目所經者皆能舉其大要見人則抑然退讓有  
若無實若虛於君見之鄉里事有義當出者必出  
前後兩制府阮公鄧公皆敬禮之阮公延爲學海  
堂學長鄧公延課其二子君抱道自重當言則言  
絕不干預外事然君之不可及不僅在是也君世  
系見於黃香石舍人所撰墓誌其著述見於金芭  
堂孝廉所撰家傳

松心  
文鈔

吾黨有績學篤行君子曰林月亭先生考桂圃公  
先生嘗構寢廟以祀四親顏曰桂圃家塾先生敬  
以持已誠以待人言行悉以朱子爲法教授生徒

百餘人擢科第者甚衆而能敦內行勉實學者往往不乏又深得先生之傳者也配李孺人先卒子世懋諸生孫男二人道光丁未孟夏其弟伯棠茂才奉先生柩葬於白雲山雨花臺之原

粵嶽山人文集

先生考桂圃公歿先生蔬食不入內室者三年先生爲學官諸生貧者免其冊資貧而能文者或贈

以赴科之費

林月亭遺事黃位清記

脩本堂遺書已刊者毛詩通考三十卷毛詩識小三十卷史記蠡測一卷供冀小言二卷古諺箋十一卷冠昏喪祭儀考十二卷公車見聞錄四卷脩

本堂稿四卷月亭詩鈔二卷未刻者易象釋例十  
二卷易象雅訓十二卷毛詩傳例二卷春秋左傳  
風俗二十卷三禮注疏考異二十卷史學蠡測三  
十卷古音勸學三十卷兩粵水經注四卷粵風四  
卷日用通考十四卷脩本堂文集四卷脩本堂外  
集四卷脩本堂駢體文鈔二卷禹陽山館詩鈔十

二卷

劬書  
室集

標題

擬張茂先勵志詩

四言

觀星 番山

燕窩

以上  
五古

石鼓歌

嶧山秦碑

伏生

圖

拱北樓銅壺歌

以上  
七古

舟中望峽山同張南山

維屏

汪益齋

鳴謙

金醴香

菁茅

詩云幾年不到峽山麓似有山靈笑人俗舟

行四日宿雨晴山迎水送皆新綠我見名山如故

人重來草木逾鮮新江間水光金燭壁壁上石氣

雲嶙峋火急沽魚煮新酒分箋刻爛須吾友猿鶴

招人未可親凝碧灣前屢回首注日山中文字奇

蘇碑米石幾人知

蘇文忠一碑久失才元章題刻寺僧皆無知者

若得載

書兼泛宅他年我願作漁師月亭此詩作於嘉慶

庚午十一月時余與月亭益齋醴香同舟北上辛

未正月初八日同遊西湖宿淨慈寺登望湖樓觀

西湖雪景方丈主雲和尚工詩善畫齋廚素饌既  
精美禪房几榻亦雅潔五鼓聞南屏曉鐘四山皆  
響山水之緣友朋之樂事隔四十餘年月亭益齋  
皆作古人而余與醴香俱七十老翁讀月亭遺詩  
落月屋梁如見故人顏色也

聽松廬  
詩話

嘉慶癸酉春同林月亭黃香石汪益齋黃在菴金  
醴香吳石屏吳菊湖遊雲泉山館名山良會追思  
已四十餘年今存者余與香石醴香三人耳是日  
月亭有詩云山留人乎人留山此事須得山靈說  
余謂人留山此人非凡此語亦非凡

聽松廬  
詩話

摘句

寄身萬類中超然見初心

超然亭

虞帝傳疑事蘇公絕代才

九成臺

人才多白屋客路近紅橋

雪齋

才子能傳地騷人易感秋

滕王閣

華屋遷移盡騷壇獨不磨

南園

上界神仙延壽酒世間兒女夙興身

元旦

元旦未有不起者夙興身三字中有億萬人妙以經語出之聽松廬詩話

青燈白屋誰千古紫陌紅塵彼一時

立春

楊柳橋頭初轉馬杏花時節始聞鶯

春游

野樹飽霜皆有色傲裘經酒已無痕

度大庾嶺



二分明月開珠箔一路垂楊到板橋

揚州

森森風露催華月閃閃星河近素秋

夜起

暮雨自歸山悄悄秋河不動夜厭厭李義山句也森森風露催華月閃閃星河近素秋林月亭句也義山句含靜女之情月亭句見幽人之致聽松廬詩話

種花村落多重疊近水人家易往還

花埭

射虎幾曾隨李廣觀魚須得問莊周

春日

可是長庚無落葉每逢周甲有開花

鐵樹

問天情緒因才藻傷命文章或色絲

劉寅甫集

欲問禹山何處是路旁童子說高坡

禹山

今城內地名高坡相傳卽古之禹山愚謂此特禹山之小支耳松軒隨筆

國朝詩人徵畧二編卷五十五

番禺張維屏子樹輯

謝蘭生

字佩士號澧浦廣東南海人嘉慶七年進士官翰  
林院庶吉士有常惺惺齋集

蘭生年四十三始成進士選庶吉士請假省親以  
父年老未散館丙寅父歿遂絕意仕宦迭主粵秀  
越華端溪羊城四書院講席月課嚴甄別士風丕  
變晚年好道嘗論濂溪主靜伊川靜坐朱子明心  
均不外主敬工夫怡然有得歿前五年預書遺屬

喪葬事纖悉周詳敦儉守禮務革粵省奢汰之俗

卒年七十二

南海縣志

澧浦爲雲隱先生仲子學有淵源少負文名兼工書法旣入詞館假歸流連山水揮毫灑翰風致清豪其詩宗法大蘇又出入於杜韓兩家而得其神

骨邇來嶺表詩壇固應推爲祭酒

嶺南羣雅

太史爲吾師馮耒廬廣文壻也少遊婦翁門五經

紛綸克承其學時推古文好手餘事作詩人耳然

刻削繁嚴與書法畫品皆能以雋永見長

嶺海詩鈔

里甫太史詩不傍古人自標襟韻

賓谷詩話

里甫先生少時曾刻師事大蘇小印淵源有自故

所作古近體詩大氣磅礴老筆紛披

楚庭耆舊前集

先生詩古文詞久推騷壇祭酒鄭虔三絕兼擅其

能而畫理尤深殆石鼎道士以後一人

茶村詩話

里翁畫有奇氣與弟退谷

觀生

皆以畫名時稱二

謝論粵畫者推君駕二樵而上殆無愧色

松軒隨筆

門人謝子輝

曜

乃里翁之孫也有自題畫句云吾

家六法尋常事三世相傳十八人詩註先太史至

曜凡畫者十八人皆曾大父所出洵謂家庭佳話

藝苑美談

老漁閒話

標題

遊惠山

五古

樵舍

夜渡鄱陽湖

七古

摘句

地古人留姓衢通國不蠻

度庾嶺

佛亦稱無量臣今偶一中

飲酒

風牀鳴敗葉雨檻墮空花

卽事

四十萬言成學問三千餘歲作春秋

東方朔

倚檻堅陪諸佛坐斷雲時帶一僧還

冷泉亭

一區得號藏春塢出世何妨大布衣

和南嶺

醒酒最宜文字飲豔粧何與老年人

看牡丹

天下此花兼此果不同時節共稱仙

題羅兩峯

畫梅時方啖荔里翁每逢夏日喜作荔灣之遊其真仙耶聽松廬詩話

孫源湘

字子瀟江蘇昭文縣人嘉慶十年進士官翰林院編修有天眞閣集

君考太守公先官治中乾隆己亥君年十五赴奉天省親出山海關登醫巫閭援筆賦詩已有驚人句壬寅太守守上黨命君由里攜眷赴晉登太行山賦長歌甲辰太守左遷成都別駕命君奉祖母南還是年入學君未冠卽壯遊登臨覽觀得江山之助旣而里居多暇沈酣載籍益肆力於詩乙卯舉於鄉丙辰會試下第壬戌復下第歸途與舒鐵

雲位

王仲瞿

兩孝廉同行三人才相若心相契

而梧門學士

法式善

爲詩贈鐵雲仲瞿子瀟題曰

三君詠於是三君詩名若鼎足焉乙丑君成進士

入詞垣年四十一矣余從翁祖庚太史

同書

處借

天真閣集讀之集十六卷編年至甲子而止擬致

書太史再索寄其甲子以後詩

聽松廬  
文鈔

子瀟太史生平最重情字其詩有云情者萬物祖

萬古情相傳又云此生如春蠶苦受情束縛又云

在我則爲情及人則爲仁數語發揮情字可謂簡

括透關余嘗謂性未發不可知情旣發乃可見古

來忠臣孝子義夫節婦雖是性生總由情發只此  
不忍忘不忍負之一念便是情所固結情所彌綸  
讀子瀟詩可謂先得我心

聽松廬  
詩話

子瀟詩有兩種一種以空靈勝運思清而能入用  
筆活而能出妙處在人意中又往往出人意外一  
種以精切勝詠古必切其人論事必得其要固是  
應有者有却不肯人云亦云

聽松廬  
詩話

天真閣詩骨力沈鬱不及船山却無船山集中之  
叫囂才氣富贍不及隨園却無隨園集中之遊戲

聽松廬  
詩話



子瀟今體詩全首渾成者甚多偶錄數首

謁孟子廟

闕里斯文喪乾坤一戰場大賢天挺出古道日重  
光功業追神禹尊崇亞素王廟堂瞻企久門外嶧  
山蒼

岳忠武墓

鄂王墳上樹蒼蒼嘯起悲風哭靖康宋室已收檀  
道濟朔方猶畏郭汾陽朝廷自毀擎天柱宰相方  
開偃月堂千古奇冤成劍格不須鳥盡已弓藏

通體警鍊沈鬱能拔出前人名作之外

聽松廬詩話

入都留別

輕裝檢點終年服半是慈親手自裁恰喜六旬猶  
老健頻催千里莫徘徊秋風或報佳音捷生日應  
添笑口開得固欣然失亦喜從容負米定歸來

從來路近說長安往復雙魚達不難書莫經年忘  
却曬詩須按月寄來看深知蓬戶持非易猶喜金

釵典未完祇恐閨中太岑寂故教新婦爲承歡

前月

爲大兒  
成婚

四月池塘春草長紫荊花下共行觴長空去鳥甯  
無路故國飛鴻自有行天下莫如兄弟好人生偏

是別離忙黑貂裘與黃金幣重潤蕭蕭季子裝

爲汝匆匆賦感婚居然桃李爛盈門稱翁尙覺慚  
聽婦娛母先期要得孫書課莫忘教弟妹慈闈須  
代定晨昏家風不敢獅兒望且免人呼作犬豚

綠陰千里噪栖鴉四月南風上水查好友豫先期  
後會詩人偏是愛天涯合離始覺文章妙灑脫須  
知繫戀差看得故園花事畢搖鞭去看上林花

仲則入都畱別詩氣體高邁子蕭入都畱別詩  
情致纏綿各有至處皆不磨之作也

聽松廬  
詩話

宿西巖

秋水滿青天天心一月懸太清爲世界不睡卽神  
仙列宿兩三點前身億萬年清風莫吹我我意已  
飄然

余生平最愛坐月嘗謂一輪皎潔萬象澄清身  
在冰壺卽此是瑤臺仙境子瀟此詩恰如吾意  
所欲言 明月前身誰不解用只加三字便成  
奇語 直說飄飄欲仙亦常語耳偏說風莫吹  
我一吹便仙去妙不可言

標題 赴金陵作 書王文成公詩卷後 張公

洞 情箴七首 天真閣集刻成

以上五古

太行 古劍歌 盧忠烈公祠 大雪同

頊儒 朱烈女 賣饊兒 岳祠銅爵

埽花篇 月華歌 蕊宮花史曲 晉將

軍周處袍笏墓 善卷洞 文孝女 黃

貞女 梧門先生寄三君詠作歌

以上七古

摘句 墮地爲男兒於世竟何補

萬物各有能彼此不相代

男兒少憂患何以成英雄

情者萬物祖萬古情相傳孩提不學能聖

王以爲田

在我則爲情及人則爲仁世有理外事斷  
無情外人

朝作一緘書暮復易其稿上積淚痕多恐  
傷親懷抱

道存無顯晦權重在文章

謝呂叔誦爲  
先公撰墓碑

骨肉奔飢餓親朋老別離

生才關世運厭亂識天心

春愁雙蚊蝶曉夢百鴛鴦

綠深蝴蝶靜花落美人孤

一山飛綠下萬樹擁秋來

獨當春正月纔是百花王

梅花

二叔事開唐社稷六官書誤宋君臣

周公墓

萬世不經烽火地一城多是聖人孫

曲阜

道甘三黜從官小謚定千秋賴婦賢

柳下惠墓

不成事豈殊充竇得勢兵先據絳汾

唐太宗

偏安早定平王計返駕先愁叔武迎

岳忠武

此二句誅高宗之心

岳忠武所以見殺

得歸鄭伯知誰力必殺元暉始有名倘使

上皇終北狩諸公何處奪門迎

于忠肅

結二句足以塞徐石之口而褫其魄

漢帝故鄉思沛邑周家王業重幽風

盛京

貧賤始多閒暇日宴遊須及太平時

樓臺侵曉雲爲夢絲竹黃昏月有聲

好境未來尤耐想名山終到不嫌遲

人歸祇覺貧俱好天道無如熱最公

煙霞總出文章口泉石能消仕宦心

詩關天分清逾妙語透人情淡更真

花非薄命何殊草詩若無情不算才

坐鄰水竹都忘俗修到神仙只是閒

人如不俗終難富事果能癡便可傳



圖書漸富釵環減，鍼帶偏疎筆硯親。

示內

書將子課如親讀，詩共妻聯勝獨吟。

賴有閨房如學舍，一編橫放兩人看。

五鼓一家都熟睡，憐卿猶在病牀前。

病中贈內

合數句觀之，可想見閨房之樂，又可想

見伉儷之篤。

聽松廬詩話

富家一箇如山重，蕩子千金作浪拋。

詠錢

幾日落花人去後，一番寒食酒澆時。

春草

席佩蘭

號浣雲，昭文人。庶吉士孫源湘室。有長

真閣稿

正始集

子瀟詩多伉儷語，故附識之。

彭壽山

字子仁號石夫江蘇泰州人嘉慶十二年舉人官  
江西樂平縣知縣廣東永安縣知縣有留雲閣詩  
文存稿

公三歲失恃爲祖鍾愛祖歿家中落境益困州府  
試屢前列未售北上占籍大興入學第一嘉慶丁  
卯中式舉人戊辰改歸本籍在京恆館卿相家托  
知亭相國延課其孫癸未大挑二等選潁上縣教  
諭悉心訓迪俸滿保舉引

見以知縣用壬辰揀發江西歷署瑞昌鄱陽都昌縣事

大吏以公勤明幹練 奏調樂平丁酉充鄉試同  
考官戊戌緣事議降奉

旨引 見

特恩開復辛丑揀發廣東委署徐聞旋補永安甲辰二

月涖任審結數案民情悅服鄉報命案立即往驗

會開礦歸途徧歷礦山感受山瘴遂病公子勸少

休公曰官事遲則弊生豈可畏勞仍力疾判牘就

寢卒享年七十公性孝友居家待戚黨有恩居官

視民如子歸櫬之日沿途哭奠公配張孺人子榮

紹廣東候補鹽運司經歷

永安縣知縣彭君墓誌  
庚子舉人婿崔世霖撰

石夫大令宰樂平適境有蝗民以爲神蟲不敢捕  
君下車手裂數蝗謂眾曰蝗能爲祟我自當之於  
是懸牌諭民力捕酬以值蝗旣捕盡晚稼且豐至  
春燈節民間戲燈作諸蟲前導以君姓彭乃爲大  
鵬口銜一蟲牌寫天差鵬鳥收盡蝗蟲八字君爲  
詩紀事有云春燈善戲民媚我大鵬幻出天差謠

此事可爲捕蝗作一佳話

聽松廬詩話

彭石夫有詠史詩作序者魏春松

咸憲

顧南雅

菴

黃霽青

安詩

董琴南

國華

四君皆余故交春松序

云予守揚州分題試八州縣生童得彭生卷詩文

爲童卷中寡二少雙之作亟首選焉南雅序云戊辰余分校禮闈得石夫卷薦而不售旣來謁與之語益信其爲篤學君子霽青序云石夫詠史詩事覈其要言取其簡非徒談宗抑亦古鏡琴南序云石夫詠史遠溯皇初近迄元季一代大事靡不標舉觀四君之序不徒知其詩亦可知石夫之爲人

矣

松心文鈔

石夫詠史七言絕句三百餘首是編不能多錄隨意錄數首譬之嘗鼎一臠畧知其味并就愚見率

綴數言

聽松廬詩話

都徒咸陽令茲專衛鞅何罪不滔天傷心最是開  
阡陌能使周官法蕩然余謂商鞅開阡陌固有罪  
矣然封建變而爲郡縣井田變而開阡陌皆事勢  
所必然封建井田斷不能行於後世也 陽翟居  
奇術太奇邯鄲生子妙當期嬴秦已逐東周滅呂  
政宗祊更祀誰余謂人知秦滅周不知周亡秦亦  
亡讀石夫此詩足奪秦人之魄而吐周君之氣

清議颺馳黨禍興咎傷同類始甘陵不仁疾甚終  
爲亂郭泰曾思誨李膺余謂東漢明季兩代黨禍  
皆由君子疾不仁太甚石夫一語抉出禍根上

摘句 人生無百年朽腐亦草木大半因飢驅豈

不戀松菊

雜憶

傲骨天所與忍餓吾何羞

流水慣作勢百步必一曲

泛舟鷺  
絲湖

片雲暝眾山一雨洗萬綠

采石

草間亂蟲響花外一螢飛

夏夜

涉世存真我披襟見古風

贈喻  
小樓

苔新綠皺庭邊水樹古青堆屋後雲

夏日

來日簪花愁鬢短中年對竹解心虛

遺興

剪鯨驅鱷尋常事一劍防身待指揮

言志

丁嗣曾

字孫誠號循陔福建同安人嘉慶十二年舉人官興化府教授有循陔詩鈔

君賦性醇厚天資聰穎喜博覽工時文復耽吟咏與同時許侍講邦光許太史有韜二先生游爲二先生所推重嘉慶丁卯舉於鄉居鄉設教循循善誘里中後進多所造就簞瓢屢空晏如也生平以品節自操不涉辭訟道光丙戌大挑二等選授永春州學正己丑蒞任癸卯陞興化府教授視事數

年歿於官舍

丁星南筆記



摘句

孤峯盤鳥道飛瀑漱雲根

大鵬山

由來官號冷祇覺士仍寒

學署  
卽事

爲謀升斗祿久作宦遊人

欲謝朝簪去其如家計貧

自古共推裴晉國而今豈乏郭汾陽

有感

一網計深同志錄三朝典著黨人書

東林

阮大鐵作東林同志錄魏璠令人作三朝要典目東林爲黨人皆欲一網打盡

富貴花開春一色清平詩譜調三章

牡丹

畱春無計餞春去不惜杖頭沽酒錢

送春

兒女何知理學事踏青爭上昔賢亭

永春  
竹枝

梁信芳

字菴甫廣東番禺人嘉慶十三年舉人有桐花館  
詩鈔螺深竹窗藁北游草

君邑試冠軍學院試取入郡庠第一名旋補廩生  
嘉慶戊辰 恩科舉人截取知縣道光癸巳本省  
辦賑出力奉

旨賞加六品銜

覃恩誥封奉政大夫生平秉性方正持躬端謹寡嗜好  
惟於學孜孜不倦公車計偕五次癸未南旋不復  
出家居課子姪極嚴雖年至逾壯訓飭之不少假

晚歲益厭時事杜門謝客究心經史暇卽吟詠自

怡所著有桐花館詩諸集喪禮酌宜家訓摘要子

九人國瑚

道光辛卯副榜已亥舉人辛丑進士翰林院編修

思科

國瑁

候選直隸

州國琮

丁酉拔貢丁酉解元戊戌進士翰林院編修

國璜

甲辰恩科舉人候

選訓導

廩貢生候選訓導

國璣

癸卯科舉人

國瑗國珠國琯

俱業

孫十二人菴甫封翁事略

兄弟先後入詞垣而弟先兄後未見有著於篇章

者菴甫封翁聞大兒館選詩云何妨讓弟稱前輩

已較儒官上數尋

前署澄海教諭故云

讓弟稱前輩固天倫

之樂事此詩傳之他日亦翰苑之美談也

聽松廬詩話

薊甫孝廉有大水行一首詩云門前滾滾水如川  
頻移家具板作船序云道光癸巳七月十五日水  
漲入戶父老言前癸巳避水情景如是 九曜火

一首詩云斯須人鬼何憊何罪序云道光乙巳四  
月初五日九曜坊神誕演劇于學署前不戒於火  
死者一千三百餘人 牛欄岡一首詩云十三鄉  
人皆不平牛欄岡邊憤義盟男方弱冠俱請纓婦  
能執纓願從征 山響樓一首詩云賴有白衣人  
障敵指揮無限火鴉沉註云夷人火箭射入城共  
見白衣人揮之箭皆墮地大吏奏請 賜額敬懸

粵秀山觀音廟以上四首皆羊城之往事廣郡之

異聞節錄數言以備一日之考證

聽松廬詩話

文信國當日若棄官遯跡未嘗不可爲世外冥鴻而必舍生取義者此所以爲大忠也薊甫詠信國詩云胡不鳴夷浮滄溟胡不晞髮先逃名公曰嗟綱常名教不可欺事君如親志不移親病雖危豈

輟醫醫雖不治藥勿離數語寫出信國心事上

薊翁詩註云粵中佳果以荔枝龍眼柑橙爲四傑

余謂當以荔枝甜橙甜羊桃香蕉爲四傑

老漁閑話

標題 新建學海堂

五言排律一百韻

親病醫自  
不效可恨  
國藥之元  
人之二三

摘句 事有願不願人有能不能 述志

同一事也此以爲苦彼以爲樂此以爲

易彼以爲難蓋有莫能相强者 聽松廬詩話

路遙馬復滯望店如望家 起車

望店如望家五字寫出車路困苦情狀

匆匆理婚嫁年年添米薪 答友

愚人有此累賢人亦有此累俗人有此

累雅人亦有此累添字尤累上加累 同上

武庫欣藏甲文書喜協寅 寄馮默齋

豹藏無遠志魚疾問芎藭 題劍公集

城市半樓殘照裏青山多爲古人留

文山故里

乞食幾人知國士窮途有母念王孫

漂母祠

不待日高先見日漸看山盡更無山

登浴日亭

放眼煙花開鐵甕盪胸雲日沃金焦

京口渡江

倚樹微吟緣結習惜花無語爲鍾情

林下

鶯花珠海連三月觴詠蘭亭又一時

修模

雙屐醉歸花引路半窗驚起烏吟春

集杏林莊

行樂及時偕長少尋春依舊踏溪橋

戊申元旦

書生敢妄談家國世路誰教長棘荆

新築礮臺

一樣風漪蘇病骨半溪雲影淡禪心

榕門消夏

薊甫孝廉著喪禮酌宜一卷 撮其大意錄於左  
買水宜省 家有泉汲之非不潔也何必痛哭  
沿街甚至鼓樂導前不以爲怪乎

送帛宜省 送而不受無此理或納置於懷或  
付之隨僕無服強之服而仍不服甚無謂矣

鼓樂宜省 禮曰鄰有喪春不相里有殯不巷  
歌喪家鄰里且不樂乃鼓樂喧闐於心安乎

點斂宜省 請貴賓不如請練習者清點之

答祭宜省 喪家計貨售值豈平日以道義交  
轉而爲市道交乎



齋醮宜省 人子何忍薄視其親必謂親有過而假手於僧道以救之哉總之踵事增華互相競尚耳

陰宅宜省 募紙工做陽宅爲之火燄燭騰糜費多而又驚衆是愚孝也

出殯宜省 今之出殯者誇多鬪美親喪大事幾等賽會迎神不近於兒戲乎凡事求悅庸衆人之耳目未有不爲君子所鄙者

薨翁此書行世喪家無益之費其或可以少減

乎

老漁  
閒話

孫珩

字汝帶號蘭陔福建惠安人嘉慶十四年進士官商邱縣知縣署汝州知州有歸田藁

君年十七補郡學弟子員明年戊辰舉於鄉己巳恩科成進士以知縣卽用甲戌補郟縣丙子署汝州戊寅秋闈分校得士十人今兩廣總督徐公廣縉卽其所得士也己卯調商邱庚辰以卓異保薦壬午引疾歸里辛卯病卒年五十有一其在郟也邑有龍山書院君捐廉給諸生膏伙課卷必親爲閱改邑西路值霖雨水漲發十餘里皆爲溝渠君捐

廉修治用石覆之長一百十八丈引水達於汝由  
是水患悉除而通汝洛之路平如砥焉邾值大荒  
邾人地畝賤售於西商君榜令盡贖西商議以數  
萬金寢其事君却之令業主將贖價當堂交繳聽  
業主收麥邾民復得田咸頌君德焉其在商邱捐  
廉修縣學又修文正書院嘗護理柘城適河決馬  
營君先發銀交紳耆搶築城堤於是柘民賴以全  
活明年河決蘭儀而柘民無患柘民德之立去思  
碑君論學貴躬行實踐不空談心性歸田卽仿范  
文正公置義莊自始祖支祖至高曾祖祀業外卽

以贍一族艱於鄉會試及婚娶喪葬者其治家嚴  
師巫不得至門擣蒲不得入座居喪不用僧道不  
作佛事建六松居書閣購書萬餘卷朝夕丹黃其  
中著有歸田詩藁三卷文藁三卷君歿郊人建祠  
塑像峨嵋山又請祀名宦祠子四人文圻邑廩生  
文垣拔貢舉人文城邑庠生文塿業儒道光庚戌  
文圻來粵以歸田藁見示因節其大要刻入詩人  
徵略君有詠史七律數百首詠漢高祖李太白兩  
首最警全錄之餘摘句錄於後

聽松廬  
文鈔

漢高祖

醉酣大澤斬蛇餘氣壓中原逐鹿初一世英雄歸  
駕馭三秦父老望旌旗太牢過魯獨先祀苛政入  
關能首除可惜蕭何真計吏只收圖籍不收書

李太白

爲對金鑾下九垓前身本自出蓬萊風流萬古詩  
千首月影三人酒一杯能識汾陽非醉漢曾奴力  
士是仙才官袍照耀長江水却笑山頭戴笠來

摘句

人本功名窺道學治分周召雜申韓

子產

春秋公子原無兩秦伯流風又讓三

季札

文章千古無雙體人物三湘第一流

屈原

儒扁闕內坑難到書在胸中火莫焚

代生女

帝胄之中真好學秦灰而後有全書

河間獻王

遙啓後儒原道秘一空前古雜家流

董仲舒

壽不中年天亦妬策行死後志還伸

賈誼

人覩威儀驚漢制天教雷雨助昆陽

漢光武

精忠早已終麟閣風雅還能啟建安

蘇武

黃巾臚拜賊知敬赤脚通經婢亦儒

鄭元

遙祖靖王原正統能臣諧葛是英君

蜀先主

晉室興亡憑一戰東山綠竹自千秋

謝安

才希諸葛分純駁心許南朝貫始終

王猛

黃玉衡

字儀徵號在菴廣東順德人嘉慶十六年進士官御史有安心竟齋詩集

在菴弱冠餼於學辛酉中拔萃科是年以副榜貢廷試用七品京官順天丁卯北闈中式辛未成進士館選官編修戊寅大考列二等京察一等記名以道府用己卯補御史玉衡生質明敏而性至孝方會試丁外憂書未至恍惚有所聞遽請假不與試得赴哀號抵家不復能步丙子己卯兩爲順天同考所得多知名士廣東巡撫吏例輪季入供事防不

使出則設館於外曰外馬以密書通出入玉衡條

陳其事奉

旨查禁玉衡少承家學詩文皆尙正軌書各體皆工自

臺乞假歸病卒於廣信舟次

順德縣志

侍御篤志力學官居清要有侃直聲

粵東七子詩鈔

太倉盛子履孝廉 大士輯粵東七人詩合刻之名

曰粵東七子詩七子者陽春譚康侯

敬昭

順德吳

秋航

梯黃在菴 玉衡

香山黃香石

培芳

番禺張南

山

維屏吳川林辛山

聯桂

鎮平黃香鐵

釗

也嘉慶

己卯諸君同在京華適朱竹垞故宅紫藤盛開同



人開筵賞花擊鉢分韻當時年華方盛相與倚裳  
聯襟縱飲高歌灑然不知身在軟紅塵土中也今  
追思之事隔三十餘年七人中存者惟秋航香石  
與余三人耳秋翁居順德久未晤言香翁居省垣  
而余近養疴江村亦少會而因輯在菴詩人詩人  
徵略概朋儔之易散嗟少壯之難回逝水晨星撫

然興歎

老漁  
閒話

在菴詩有高澹者五言如白雲寺云暝坐仰青漢  
松脂吹古香蕭然松際月先我下迴廊有雄健者  
七言如登金山云登高高唱大江東東去長江萬

派通明滅樓臺飛鳥外蒼茫煙樹亂帆中一聲北

固寒鐘遠百戰南朝故壘雄咫尺焦山慳曳杖遙

看積翠入空濛此詩詠金山可稱警切

聽松廬詩話

標題

假滿還都留別諸兄弟姪

五古

鄱陽湖

七古

摘句

全家尚寄燕雲裏遠夢先歸嶺雪邊

南歸

二分明月千家笛十里垂楊兩岸樓

揚州

人如落日聰明減交到中年感慨多共識

揚雄文似者其如李廣數奇何

與秋航夜話感贈

難將大藥回元髻但恃羣書忍赤貧

側身天地詩篇在極目江河涕淚橫

寄盛子履

國朝詩人徵略二編卷五十六

番禺張維屏子樹輯

郭 麐

字祥伯號頻伽江蘇吳江人諸生有靈芬山館詩  
集文集

其目無人其心無我與世周旋謂狂也可規模昔  
時文亦宜然不趨利祿之路遂爲他人所先至其  
鉢心措胃咀官含商穿穴險固窮極豪芒與時賢  
而相較似有一日之長

靈芬館主像贊

右頻伽像贊頻伽謂其弟鳳所作實則頻伽自  
作頻伽雖狂然極近情極服善聽松廬詩話

吳穀人先生曰郭白眉詩希軌於謫仙取雋於玉  
局麗而不縟清而益深其力可負風雨飛其氣纍  
纍乎如貫珠而不絕

阮雲臺先生曰頻伽詩自抒其情與事而靈氣入  
骨奇香悅魂所爲古文雅潔與麗有古人法律所  
填詞清婉穎異具宋人正音

屠琴塢曰祥伯詩行海內四方能文之士交口稱  
之

珠海老漁曰頻伽以靈芬名集其心靈其筆靈真  
得乾坤清氣者也其詩其文其詞皆必傳

聽松廬詩話

頻伽入都錄別語云長安遠於天無乃居不易行  
李已艱難而况旅食費然而意一發辟如馬脫轡  
交知相憇懇更若騎虎勢將行未束裝老母意先  
碎心知事垂成卽言亦無濟又念將遠行吉祥多  
所忌所以翻懽然有淚暗中制惟於閒坐時略問  
以後事長跪告老母瓌悉述難備第一可勿憂已  
有噉飯地歸來亦不遲不過一二歲功名適時會  
文字有交契豈敢欺吾親一一定如意

入都臨別安慰親心情事一一如話然此意人  
所同有此筆人不易有非深於古文者不能

頻伽五律有清空一氣而風格高超者偶錄其一  
贈楞香詩云勸爾一杯酒月華如此明天風又  
吹我同在秣陵城相見不盡醉相思空復情明朝  
楊柳樹葉葉是秋聲 又有質直如話而意思沉  
着者偶錄其一 吳江葦詩云昔我先君子君曾  
師事之我時騎竹馬衆笑此狂兒只有君知己今  
惟某在斯因茲感往事淚下又連絲

頻伽博學多才金蘭畦尚書

光梯

以國士待之頻

伽入都居尚書邸第與兩公子爲昆弟交下第出  
都行至中途賦詩寄兩公子其一云留將苦語待

分張及到臨分事事忘歲月不多須愛惜科名無  
定且文章平生已累閒情賦年少休登結客場寄  
向天涯倍珍重莫嫌不似說來詳第三句勸惜光  
陰第四句勸習舉業第五句戒好色第六句戒濫  
交句句入情句句有味忠告善道不愧良友  
頻伽絕句美不勝收偶記得兩首遂錄於左

一笑投壺掣電同阿香車轂走隆隆天公事事煩  
兒女青女飛霜少女風 蠹魚食字不成仙雞犬  
紛紛多上天莫怪華山陳處士暫停棋子卽高眠

雞犬亦可升天無怪陳搏高臥

以上皆聽松廬詩話

標題

古詩三首呈惜抱夫子

詠史三首

三人說詩圖三首

三人郭頰伽屠琴鵬查伯葵

入都

錄別三首

讀黎簡民詩集用其讀黃仲

則集韻題之

旅食十首

書武清事

以上

五古

書廣陵集後

兩生相逢行贈彭甘

亭

九日鳳凰山登高

再題黎簡民集

以上七古

謁大禹陵二十四韻

五言排律

摘句

若河濟江淮各各成一瀆

學問文章能如河濟江淮各成一瀆是

能自樹立者一代中無多人

聽松廬詩話



大禹泊水土不言何以治周官分兵刑亦  
無戰陳事古人憂世深惟恐後人泥無窮  
者世宙不窮者神智豪傑時一生任其自  
爲計賈讓上中下三筭詞已費王莽六十  
家不救昆陽敗紛紛論古今俗儒乃多議  
蔑古害事泥古亦害事此詩大有見同上  
帝女欲填海愚公思移山人生貴立志安  
見成空言精誠貫天地假我以歲年勿謂  
賤士賤一專皆能傳

一專皆能傳五字警絕有志者勉之同上

惟有三數人青衫仍下第安知非天公位  
置各有地與以一時窮責以千秋事

大爲下第人吐氣然非實學不足語此  
處世一大事無若生與死死後不能生生  
時可知矣

死後能生各有不同大者功德昭著次  
者著述流傳又其次則一件兩件善事  
一篇兩篇佳文一首兩首好詩一段兩  
段嘉話在人耳目俱是能生蓋形骸死  
物心神活物心神傳便是生矣

同上

將爲飛鳥飛先作螿蟲螿

惟有千秋業非由一第傳

萬戶同分月一生先得秋

膚功憂患得心學釋儒參

王文成祠

二陵風雨秦人骨萬里黃河漢使槎

送人出塞

但使龔君能買犢不教馬援見飛鳶

詠史

聞說仙人爲蜃市有時君子亦蟲沙

讀佛道藏

憂果能埋何必地人猶難問况於天

夢中得句

恩怨未忘猶意氣死生能了亦英雄

追感秋槎

直以一身穿萬竹忽然四面立羣山

入韜光寺

出險方知山可惜回頭已在水中間

焦山渡江

江湖味飽華年暮山水緣深性命輕

殘葉無風猶戀樹活雲如水欲浮山

山行

商量早睡夢頻醒約略近家心轉忙

吳門夜泊

月與梧桐尋舊約秋將蟋蟀作先聲

卽事

便教世世爲兄弟其奈年年有別離

將行有作

若得諸君成雅集也留故事與他時

相約置身非一第若論退步尙千秋

寄金藏園

與我周旋能幾日一年終始是梅花

歲暮雜詩

當時相對花同笑其上親題字一行

題女士畫

凡言情之作要矜貴不可猥褻可有寤寐求之之意不可有伊其相謔之風善言情者以李義山爲最昔人目白樂天爲廣大教主余目李義山爲情天教主其次則劉夢得韓冬郎至明王次回則不免有猥褻之語矣

國朝詩人善言情者不少以黃仲則樂蓮裳郭頻伽三家爲最頻伽含情若柳吹氣如蘭於憔悴婉篤之中有悱惻芬芳之致偶錄數句於左

聽松廬詩話

詩思逢秋容易瘦美人如月本來孤

遠道人來煙雨外傷心事在別離前

明知相見難於別，便恐重來不是春。  
容易相逢如夢寐，不多時節又黃昏。  
已悟散花餘結習，可能嚼蠟視橫陳。  
粉黛獨饒名士氣，畫圖還是女兒身。  
身能自主除非夢，事本難言賴有詩。  
定爲情死爲愁死，是不能尋不忍尋。  
有生合與情俱盡，已死難言色是空。  
自笑別人憐不受，爲卿甘作可憐蟲。  
此生若再來人世，又是垂髫欲上時。  
韓偓香奩義山格，一般淒絕與誰論。

楊知新

字元鼎一字拙園浙江歸安人諸生有夙好齋詩  
鈔文鈔

君系出宏農先世自德清遷郡城之長橋遂爲長  
橋楊氏曾祖斯覺公開米肆遇升糴者滿之勿取  
其贏如是者數十年貧者陰受其德君生而聰慧  
九歲賦月華詩有千衢瞻錦繡萬國仰文明之句  
見者奇之年十七補縣學附生旋食廩餼歲科試  
屢冠軍先後受知於王文端公朱文正公暨寶東  
臯阮芸臺潘芝軒劉金門李芝齡諸先生執經問

業者多掇科第位通顯而君乃久困場屋應鄉試  
凡十四屢薦輒以額滿見遺道光元年當事舉君  
孝廉方正力辭乃已君性敏而勤嘗於舟中偶背  
誦堯典至秦誓連蔡注一字不遺尤熟明史稿論  
某事在某卷驗之不爽所校讐書籍善本數十種  
著有夙好齋詩鈔文鈔令子蕉雨觀察宰密縣時  
迎至署君集檜陽書院諸生爲評改其制義正其  
字體之俗者韻語之不諧者邑之士多宗之君存  
心利濟舟行聞鄰舟哭甚哀旣爲棺歛厥子並厚  
卹其母葬族人無嗣者七棺友人兩世弗克葬以



及停棺暴露者君或專貲或鳩貲爲葬之飛英多  
寶浮玉三塔及潘公橋皆與同志次第修復又修  
復育嬰堂重整堂規其生平好義多類此君生于  
乾隆乙酉卒于道光辛丑享年七十有七配姚恭  
人以勤儉慈惠稱於族黨子三人炳堃嘉慶癸酉  
拔貢生由知縣洊升雲南迤東道炳謙附貢生炳  
咸道光甲午舉人候選知縣孫七人曾孫二人辛  
丑爲君重游泮宮之年第三孫錫鹿適於是年入  
泮君喜爲跋其試卷云

聽松廬  
文鈔

道光甲申余在廣濟郵人遞到一緘啓視則楊拙

園先生書也時先生就養令子密縣署中自是書  
函往復屢惠篇章有云中年求友過飢渴六十始  
遘番禺張又云新知遇南山如飢得饑饌二載結  
神交多聞更直諒又云願取君書置座右時當監

史箴銘看又云得士非一人龍頭乃楚望

南山分校得榜

元乃楚中老明經

又云武林襄郡雖殊地司馬中丞皆好

事彼毓南朝故址春

雲臺中丞種柳西湖

此添西晉名園翠

南山司馬種柳習池

余爲拙園子歌報之詩互見集中先生

宿學耆儒自言愛才如命惟余非材薄殖未曾識  
面不知何以獲厚愛於先生殆佛氏所謂有緣耶

丁亥自楚旋粵鱗鴻罕便音問久疎今秋得蕉雨  
觀察書乃知先生於辛丑已歸道山廿載神交竟  
未獲一面因就寄來事狀撮其要做詩人小傳例  
爲小傳一篇刻入

國朝詩人徵略先生詩甚富就愚見錄其尤者於左  
標題 錢唐江觀潮歌 錢越王鐵券歌 論詩

長歌寄南山秋濤凡一千二百一十八言

以上七古 岳忠武王墓用朱竹垞先生韻

重修表忠觀落成詩三十韻

以上五言排律

摘句 居官廉以平宅心明而恕

誠子詩

到家兒女大始覺客年長

送張良甫歸太原

江山畱故蹟天地入新秋

初秋登望崧臺

鐘聲黃葉路帆影夕陽橋

菽城秋望

桃花柳絮隨孤櫂流水青山入遠村

送姚十之

世事分明論成敗人情頃刻變炎涼

秋閑報罷

青鏡衰顏雙鬢素錦囊奇句寸心丹

吟罷有感

澹煙芳草南徐鎮古寺青山北固樓

京口

幸有山東振奇士獲全河朔莽書生

題蟻蝶集

自註孫徵君奇逢上孫高陽閣部書云盧

柝一莽書生屏案振奇士謂謝茂秦

潼關西峙孤峰陡河水東流一綫長

嵩山絕頂

劉仁守

字誠存號禮村廣東西甯人貢生候補訓導有靜遠堂詩草

君生於乾隆二十二年丁丑四十九年甲辰君年二十八丁外艱五十二年歲試補縣學生學使爲曹公仁虎明年科試補廩膳生五十五年君於屋旁購地建螺溪書舍爲藏書課讀之所顏其堂曰靜遠五十九年君讓屋旁地一區與族姪鎮南兄弟築室嘉慶二年君施棺濟藥自此始常訓其子慎之曰爾曹能守先業勿吝此費十年君倡議釀

金建桂河書院置田爲賓興費十五年學使胡公  
長齡科試貢禮部十九年創建宗祠左右建宅俾  
三子居之道光三年邑有虎患君商諸邑令迎廣  
西岑溪縣神前明敕封靈威伯鄧公者至本鄉旬  
日而虎絕跡復倡議釀金於桂墟立專祠焉五年  
就訓導職六年編平日讀史所得者爲束修圭旨  
時爲諸孫講說八年邑令聘修邑志君議凡單寒  
之家孝子節婦未邀 旌典者皆據採訪冊載入  
志內十三年十一月初八日集鄉黨議報賽事初  
九日無疾而終年七十有七子三人藹芝慎之恆

之孫九人錫書曰燦日揚日新日熒日文日華日  
善日楷慎之縣學增生日莒縣學增生君生平通  
六書工篆刻讀書課子尤喜觀史篤守儒學喪事  
不作佛事其志定不惑如此箸有束修圭旨二卷  
靜遠堂詩草三卷禮村印述三卷子孫皆能體君  
之志以讀書爲善世其家

聽松廬  
文鈔

劉禮村廣文蝸居放言有云人惟不知止是以有  
顛覆此本老子知止不殆之意而申言之十字中

包古今幾許事

聽松廬  
詩話

禮村紀虎詩有云忽然風猛聲呼呼舉頭見婦被

虎撲沖天氣忿怒如雷舉鋤鋤虎虎退縮數語見

入果奮勇虎亦退避

同上

佛者西方之善人耳亦飲食亦男女亦生死禮村

題涅槃經後云西去竟然無一返東來猶自說西

天見得佛死亦了誰見西天可爲佞佛者解惑

同上

竹譜云竹實主歲荒六十年一開花結實實大如

麥氣味平淡可餐至云實大如卵甘如蜜故鳳皇

嗜之則未可信也竹實詩古罕流傳劉禮村句云

呼庚未必人無補周甲方知竹亦符可稱竹實警

句

同上



摘句

好句偶然得良朋何處招

烹茶

時將書卷味下以手中杯

閉戶

重尋歡喜地不速兩三人

遊龍井

無僧花滿徑有客佛同居

過青龍菴

色相原無色禪心別有禪

青龍菴題壁

欲因貧轉淡情到老偏多

偶成

移堂就樹如求友抱甕澆花爲惜春

螺溪書舍

歲月幾何成故我烟霞大半屬閒人

同上

子未成人知有恨姑方垂老更堪悲

悼亡

腰瘦豈因拈韻苦眼昏猶爲讀書明

偶興

秋容似此何曾淡臭味如斯不斷香

蘭菊並開

夜夜碧窗圓好夢生生明月種情根

梅花

地老天荒風故故短離幽圃路又又問年

甲子都忘却記得初栽髻尙了

看梅

宋芷灣太史梅花詩無處寄人春點點

可能伴我路又又與劉禮村廣文短離

幽圃路又又各有幽趣

聽松廬詩話

乘興渾忘來去住仁寒商畧袂單綿

春行

東坡詩三過門間老病死一彈指頭去

來今禮村來去住袂單綿本坡公法

同上

許仁

字靜夫號耕餘安徽歙縣人布政司經歷有叢桂山房詩稿

君自號耕餘居士少聰穎喜讀書詩文斐然成章以父老且貧囊書業賈歲入奉甘旨外有無盡費於鄰黨若不自知其貧者蓋好善其天性也生平重信義講經濟嘉慶中安徽旱饑災民羣就蕪湖食嗷嗷很爭且釀亂當事廉居士才延訪之居士曰非先資流民出境亂不解議章程十條大府善之下他縣仿行亂乃已蕪湖有鳳林麻浦二圩左

大江右天成湖爲南鄉諸圩門戶田數十萬畝皆以二圩爲保障道光十年大水居士自漢上遄歸董賑事以工代賑明年春工竣夏水又至漫圩堤丈許居士乃賃船載老幼廢疾置高壇蓋席棚給餅餽寒爲之衣病爲之藥慮水落無芋種也爲之播麥慮土平無耕牛也爲之牧養是役也居士獨任其勞人忘其災焉蕪湖連年大水孳孳載途尸氣鬱蒸流爲癘疫居士乃倡捐掩埋資萬餘金復殫思議二圩通力合作新章十六條勞積病作踰年卒五十有八時道光十四年也居士客外久情

僞洞見又雅與黃勤敏王子卿諸公游雖經營旁  
午猶每夜挾冊呻吟非燭見跋不休宜其籌議皆  
中機括推之他邑而合推之異日亦無不合鄉使  
得縮尺綬秉寸柄其所濟豈可量哉居士由太學  
生議敘鹽知事職銜加捐布政司經歷卒後二年  
蕪湖人感其德請於官立祠於鳳林圩之殷家山  
祀焉子曰文海文注文深文瀾文深今爲南海縣

丞

耕餘居士傳  
曾學博劍撰

許耕餘先生有示三兒文深詩云昨得爾叔書云  
爾赴廣東交親爲爾喜我心殊忡忡此邦多寶玉

侈靡成鄉風須知微末吏服用何可豐需次在省  
垣筆墨間研攻懍慎事上官同儕互寅恭巡檢轄  
地方捕盜纔著功鋤惡扶善良振作毋疲癯用刑  
慎勿濫嚴酷多招兇勿以爾是官而敢凌愚蒙勿  
以爾官卑而敢如曠輦我游湘漢間聲息頻相通  
聞爾爲好官懽勝列鼎供况承鉅公知宜副期望  
衷勉爾以篇章言盡心無窮此卽黃左田尙書所  
云清淮引典示兒篇脫口吟成近自然者也哲嗣  
小琴少尹 文深 官佛山時常懸座右故能廉潔自  
守民情愛戴移任沙灣祖道攀車沿途不絕余題

其梅花卷云座右銘貽見老成漢臯詩句若爲情

此來只飲汾江水不讓梅花爾獨清

汾江  
隨筆

先生令子小琴少尹官粵三十餘年九龍司五斗  
司沙灣司三任巡檢勤於緝捕除莠安良所至咸  
得民心去任之日士民沿途祖餞去後猶稱道不  
置初不知何以能致是及讀先生示兒詩而後知  
小琴之稟承於庭訓有素也再觀耕餘居士事略  
又知先生負幹濟之才弗獲見用於世而小試其  
才於桑梓之地爲之禦災患爲之策安全蒙其澤  
者千萬人宜乎生前爲鉅公所禮重歿後而鄉人

建祠祀之報以俎豆馨香於勿替也今小琴擢任  
南海縣丞獲乎上信乎友孚乎民蓋數十載以來  
皆本家訓以爲官箴詩曰詒厥孫謀以燕翼子又

曰孝子不匱永錫爾類其是之謂乎

松心  
文鈔

姜白石詞舊時月色許靜夫詩月作故鄉色皆善

寫月色

聽松廬  
詩話

摘句 借此收放心先機爭一着

對奕

松搖絕澗疑無地人立中峰祇見天

登齊  
雲山

萬里江南春有夢三更枝上月無聲

白杜  
鵲花

羨煞江干一行雁隨風容易到吳城

懷舍  
弟



李方煦

字■號桐村浙江錢塘人有桐村遺稿

桐村先世籍本遼東從龍入關乾隆二十八年裁  
減漢軍復歸民籍少時愛習弓馬磊落有壯志弱  
冠始讀書不事舉業惟好爲詩生平詩不下萬首  
吳雲帆司馬均手爲鈔存司馬官潮州屬黃香鐵  
孝廉釗爲選刻之刻成香鐵跋之有云故人贈舊  
交千金或恤其孤雛梓其遺稿如斯高義世亦有  
之釗獨悲感夫司馬授徒之日書蠅頭楷十餘萬  
言也張南山曰友誼如司馬蓋古今所罕觀哉昔

人云得一知己可以不恨誠哉是言

松心  
文鈔

顧南雅曰桐村詩無一依傍語亦不故作新異語  
鮑覺生曰姚姬傳先生謂詩文皆須才學識三長

今讀桐村詩益信

聽松廬  
詩話

吳蘭雪曰桐村詩清新透脫處殊有自得之趣

張松心曰桐村詩云詩學亦匪易宜知正偽別終  
歸溫厚旨經史不可缺最忌優孟妝性靈乃全滅  
又云自知讀書少作詩多浮響又云須知萬事等  
風花除却功德俱難久何如一句兩句詩往往流  
傳在人口觀桐村自言則其詩其人可想見矣

同上

摘句

世間樂事多爲歡祇一晌惟有讀書樂畢

生可獨享

讀書自述

詩乃心之聲安知唐與宋

自題詩稿

癡情笑兒女無情非英雄

兩岸綠陰合一溪春水生

西溪

交豈因貧少詩從作客多

旅懷

情緣閱世淡家爲著書貧

贈鈕非石

藥能祛疾休嫌苦詩不求工但取真

酒如不醉真甘露詩儻能傳勝大年

美人似月何妨淡新句如花不厭多

自鈔詩稿

名成異日時非晚親老離家事可知

雷別伯兄

賦成南浦偏傷別客久他鄉漸似家

和伯兄韻

飽嘗世味甘原少久歷關河險慣經

舟中漫賦

書味漸深心自淡世情久閱意常平

懶雲作態難成雨野草無名各自香

理安道中

池塘楊柳鶯兒國院落梨花燕子天

憶江南

無求總覺人情好垂老方知書味甜

述懷

死且不辭何論病身同鳥有况於家

病中

但過黃河春便好柳迎花送到江南

送女南歸

春來一事差強意花好如書不厭多

喻宗論

字東白號桐鄉江西新城人優貢生候選知縣有  
停雲齋詩鈔

君爲心筠公第四子孝友出於天性七齡能詩十  
三能擘窠書尤精小楷兼善八分十六補博士弟  
子員二十五舉優貢 朝考後遵例捐知縣未仕  
而卒年四十有九配陳孺人子二榮生邑附生麟  
生出繼公弟春翁公後

東白小  
像記

心筠公升吉州牧君隨任君曾三至京師旣而爲  
諸侯客二十餘年遊楚遊晉遊豫遊山左遊江浙

聞粵所至皆有遊草嗣刻遺集什僅存一名曰停  
雲齋詩鈔蓋停雲齋名乃翁覃谿先生所題君爲  
先生所取士每至京師先生召至蘇齋得受詩學  
凡蘇齋手批前代詩集皆錄存之生平與吳白菴  
舒鐵雲樂蓮裳吳蘭雪砥礪詩學當代巨卿如陳  
笠帆阮芸臺曾賓谷先芝圃諸公皆折節倒屣延  
入幕府笠帆中丞輓君聯云得疾似予翻後死有  
才如子不長生舒白香輓聯云才名豔過黃金榜  
厄運悲同白玉樓陳碩士宗伯與君總角交聞喪  
尤慟則君之爲人可知矣

松心  
文鈔

東白明經被水紀事詩千餘字意極真至語極沉  
痛摘錄數句讀之如見句云俄聞鄰右言毒蛟條  
爲祟驚波涌地來笑兀如山勢全家率登樓踉蹌  
懼顛躓樓高地丈餘水應不及至坐席猶未暖洪  
流已相詣無術障狂瀾危樓安足恃妻孥相抱哭  
呼吸難爲計哀哉號救聲老弱隨波逝

咸豐癸丑七月廣州潮州韶州皆大水適讀喻  
東白紀事詩見樓高丈餘水高亦丈餘至家貧  
無樓者老弱隨波傷心慘目然則古人伐蛟之  
政後世豈可忽而不講哉聽松廬詩話

憑欄一俯視溪壑雲凝沍有如白綿輕曠野披新  
絮動疑江波翻平疑湖水注此喻東白登泰山詩

也余登廬山見雲起如綿如絮如波濤會賦詩狀之今讀此詩恰如吾意所欲出

聽松廬詩話

一役來前呼客名關票示客持入城客持關票白刺史刺史堂深簫管鳴歌聲未央不見客天氣寒

巖日苦仄三次出入城南北官已判行行不得

清臨

謠

此詩寫行客過關之苦凡爲官有關政者請誦此詩聽松廬詩話

尊甫心筠公宰石城君母陳孺人禱於石城之南  
天宮有孕而生君故君自號東佛子嘗作東佛子  
詩云流光轉眼到知非東佛東佛吾與爾後卒於  
四十九歲君豈前知耶何預有詩憾也

聽松廬詩話



喻君少白署遂溪縣既卸事居省垣一日見訪奉

其令祖吉州公詩草及墓誌見示越日又奉其尊

甫東白先生詩集及事略見示余皆受而讀之先

後輯入詩人徵略矣因思君祖在粵爲循吏君父

在粵爲大幕

阮雲臺制軍  
延入幕府

君則始遊巒序繼入宦

途政事文章均本家學且年華鼎盛遠大可期而

余與尊甫同受業於覃溪師紀羣兩世先後同門

緬維香火之緣益重苔岑之契

松心  
文鈔

標題 被水紀事 由孔子崖步至日觀峯觀日

出 以上上古

曹河樂府五章

七古

摘句 病餘諸事懶夢醒萬緣虛

荒村留月冷疎柳立風斜

錄有千秋在樓仍百尺存

風度樓

呼鷹走馬丁年事豪竹哀絲子夜歌

江水幾條隨棹遠春山萬笏向樓低

西竺巷

天塹自來千里闊降旛何事六朝多

江行

老樹故多藏古寺春潮不肯到巖灘

桐廬道中

小艇載將明月去客心真似白鷗閒

大好山川如舊識半從驢背半扁舟

題畫

客裏春光去更忙春歸可似客還鄉

送春

何紹元

字振熙號蓮亭廣東香山人諸生有蓮亭詩鈔

君讀書植品弱冠卽受知於學使金聽濤先生屢  
試鄉闈幾得復失生平好義自贈君松軒先生捐  
館後諸務綜理裕如建祠宇以時享祀撫猶子以  
至成人歲歉則爲粥於道以食餓者而賑貧饋乏

敦勉任郵閭里爲之稱頌弗衰

何蓮亭小傳  
陳太史其覘撰

余少時慕陶靖節先生爲人與蓮亭弟數輩於春  
秋佳日爲位祀之蓮亭閉門課子飲酒栽花極得

南村之趣

蓮亭家傳  
何明府景撰

蓮亭先生績學未遇而令子莘圃通守

朝佐

令孫

韞石參軍

自蕃

皆早年出仕居官有聲曾孫

杰年

舜年翁年翁年逢年

昆季諸人或名著藝林儒官

秉鐸或家傳治譜縣尉分符雲路騰驥方輿未艾

余與莘圃三世交情因輯先生詩樂爲敘之

松心文鈔

摘句

孤燈羣籟寂殘月凍雲流

雪夜

穿林迢遞吟秋草倚杖逍遙看夕曛

郊行

秋風水驛荒村外夜月蘆花釣石邊

漁燈

相逢莫笑生涯淡多少英雄此地來

種菜

青松不管羣葩發自養凌霄百尺枝

山居

謝元瑞

字孟符號梅亭福建海澄人貢生有梅亭遺草

梅亭以養親撫弟不克專於學既而業賈至粵爲  
楊姓舅氏所信任舅氏亡表弟幼學梅亭以一身  
肩之數十年如一日無私積亦無怠心越一歲則  
歸省有弟妹六人教之養之婚嫁盡禮里黨稱孝  
友焉又倡建小宗祠修家譜延師課學不惜重費  
平生最慕范文正公設義田一事而有志未逮惟  
於親屬之窮者量力賑恤自奉薄而待人厚處事  
和而教子嚴在粵日久未嘗寄情聲色暇時則手

一卷或吟詩作字又好與文人之有品者游至老  
不衰卒年五十有六遺命不作佛事卒之日鄉人  
及聞知者皆流涕嗟悼云

謝明經  
事略

李鳳岡先生威為廣州太守以清節廉惠著聞未

久告退論者稱其恬澹之風不可及云去歲余於

鷺航會館陪謝仰泉秀才

鴻猷

問之知為太守孫

婿仰泉敦行能文屢試未遇昨出尊甫梅亭遺草

并事略見示梅亭為太守所愛重其為善人可信

因節其事并摘句刻之且屬仰泉覓太守事狀及

遺草寄來當為補刻用誌賢守高風焉

聽松廬  
文鈔

摘句

頻懷古君子喜遇舊相知

抒懷

籃輿穿樹杪芒履踏雲端

過紆嶺

有酒盈樽堪話舊無花入眼懶尋春

偶詠

散步芳郊逢酒伴偶遊古刹遇詩人

同上

十年塞外風霜苦萬里途中歲月更

贈游借牧

水遠山長兒憶母燈昏夜靜母思兒

旅次有懷

作客怕聽秋夜雨懷人懶看暮山雲

步憲章韻

性淡久拋聲與色情深不覺別仍留

贈李提臺

文圃晴時山獻秀滄江雨後水爭流

題大觀巖

寒山一路斜陽裏惟有蟬聲與水聲

過水晶嶺

董 柴

字也愚號帷園山西介休人官涿州知州有半壁

山房詩集

也愚與梁秋谷王田夫任西郊結社唱酬號綿上

四山人嘗選刻海內知交詩曰如蘭集

國朝山右詩存

摘句 人理固有終百年一刹那天壽委運去何

事胸中羅洗盞且更酌白雲起山阿

獨酌

春風才幾日綠草徧溪山

春日郊遊

魚蝦成野市雞犬散田廬

晚過劉莊

紅杏村南晴買酒綠蘋洲上曉垂綸

漫成



吳生燮

字調元安徽桐城人諸生有因樹軒詩集

君懷才不遇頗有時名莊滋圃有恭王偉人杰二

公爲學政皆延君入幕襄校試藝而方保升太史

兄弟五人皆嘗受業於君君生於康熙五十年卒

於乾隆五十六年壽八十一歲子三人其一宦於

蜀孫五人其一宦於粵與其同鄉張雨田綸交善

雨田持因樹軒詩集八卷來爲輯錄之聽松廬文鈔

標題 查氏九烈詩有序明崇禎甲申三月關

人同時投繯賊入門見懸於堂者纍纍駭歎去

摘句 氣欲吞吳越波疑接海天 太湖

寥天上孤月老樹落殘花

夢中得二語越數日悼亡

夢中得此二句傳之他時或可爲悼亡添一故事 聽松廬詩話

氣發土中織草覺春生雪裏老梅知 冬日

燈光射樹鳥驚散花影落池魚驟來 水村

怡情哲士畱傳句悅耳雛孫誦讀聲 偶成

草綠草黃黃復綠花開花落落還開

延齡酒好燈前對比瘦人須月下來 菊影

把筆喚將前哲起鏤心畱與後賢看 放言

春到詠花秋詠月一瓢顏巷樂何窮

凌揚藻

字譽釗號藥洲廣東番禺人郡增生有海雅堂詩集

君具異稟自幼能日誦數百言年二十五受知學使者平寬夫少司農補廣州郡學弟子員時大興朱文正公石君先生開府吾粵愛才下士君與汪君大源何君應駒張君業南謝君家蘭張君廣釗何君有圖均被溫接提訓諄諄令三日一集親督教之姚文僖公視學觀風得君卷見禘祫異同考擬趙充國頌異之擢一等補增廣生而長子湘蘅

亦以科試補博士弟子人謂父子同見賞於哲匠自是茅耕亭學士陳荔峯程鶴樵兩侍郎後先督學試必高等嘉慶己巳秋海寇迫內河市井亡賴子乘間劫掠君爲畫方畧有警則縱金發礮近者赴救遠者各搯要害互爲聲援由是盜不敢犯其論學以躬行爲本以無自欺爲端以期於有用爲歸宿又嘗出海縱覽焦門厓門大小虎門觀天風海濤詩境益進康熙初都督僉事林公桂邑人也從征滇南有功而郡縣省志皆不列其名氏阮芸臺制府修通志君撰傳送局乃獲采入其他發潛

關幽見於嶺海詩鈔者指不勝屈所著有藥洲詩  
畧六卷藥洲文畧十六卷續編十二卷柱楣菴記  
六卷四書紀疑錄六卷春秋咫聞鈔十二卷藥洲  
蠡勺編四十卷嶺海詩鈔二十四卷君生於乾隆  
庚辰終於道光乙巳年八十有六子三人湘衡縣  
學優增生湘蓉湘芸孫十人

藥洲  
事畧

葉東卿先生曰合觀諸集實事求是是文之有根  
柢者至柱楣菴記可補喪禮之遺尤見仁人孝子  
之用心矣蠡勺編一書實足爲經史子集之翼亦

咳餘叢考之亞也

葉封翁評  
藥洲所著

藥洲居鄉余居城雖同邑少會面及余歸自江右而藥翁年將八十矣一日見訪出所著屬余刪定披覽未徧而翁已歸道山翁之孫其頴能守先澤

書多無力付梓茲就海雅堂文集撮舉數事於左謂舜出虞幕與堯不同姓 謂孔子生襄公二十

一年己酉十月二十一日庚子卒哀公十六年壬戌四月十八日乙丑年七十四 謂孟子生魯共

公五年四月二日卒周赧王二十四年正月十五日年八十二 謂論語誄當從說文作讎 謂五

十學易孔子年四十四時反魯不仕皆實事求是松心文鈔

摘句 住山不知好出山復思山 白雲山房

同在春風中各自榮其私 田家

膏粱豢庸材坎壤磨英奇 放言

精難成好會饑餓積新詩 贈東疇

雲籠玉宇歌黃竹露冷金盤醉碧桃 讀穆天子

傳漢武外傳

飄零節物催時序感激心情入壯年 九日

邱壑喜探何日盡賢豪常聚古來難 載酒竹壁

詞客有心俱化水美人無夢不爲雲 水仙

鏡匣凝塵釵股斷曉窗愁聽畫眉聲 悼亡